



Terenga 4: Hōtaka 11 – A me te O

He Mihi

E te hunga manawa-irihia, tomo mai rā ki te whare o Ako. He kāinga tēnei e tuwhera ana ki te mātinitini e ngākaunui ana ki te reo Māori. Nau mai kia kau tāua i te moana o te reo.

Hei Mahi Whakarongo

He ngeri te kaupapa o roto i te kiriata poto hei mātakitaki mā tātou. Me mihi anō rā a Raukatauri, mōna i whakaae kia tōia mai tētehi wāhanga o tāna hōtaka, o Iwi Anthems hei mahi whakarongo mā tātou i tēnei hōtaka whakaako i te reo. Anei ngā pātai hei whakautu mā koutou:

- 1) E rua ngā otaota ka whakahuatia i roto i te ngeri. He aha aua otaota?
- 2) Ahakoa kāore pea tātou e mārāma ana ki ngā kupu o roto, he pēhea te wairua o roto i te ngeri nei?
- 3) E rua ngā 'Rēhua' ka whakahuatia. Ko wai ngā ingoa e rua?

Kia mātakitaki ake tātou i ngā uri o Apakura e tuku nei i te ihi i roto i te ngeri e rangona tonutia ana i roto o te rohe o Tainui waka.

He Whakamārama

Hei whakawhānui i ngā āhuatanga o te A me te O, kia tirohia ētehi o ngā kupu o te ngeri i rangona i te wāhanga tuatahi o te hōtaka.

'Whanaunga mate ki te pō, tini o te pō, mano o te pō, ngā korekore o te pō.'

Ko te 'o' i ēnei taurira e whakaatu ana ko te 'tini', ko te 'mano', ko 'ngā korekore' rānei he wāhanga nō te pō.

Anei anō tētehi taurira:

Kai a te pō he kupu kangakanga ēnei. Ko te tangata e kangahia ana hei kai mā te pō. Ko 'te pō' te kei te kai i tētehi mea.

Kai o te pō koinei te kai ka kaingia i te pō.

...mahia a te iwi ko ngā mahi ka mahia e te iwi

...mahia o te rā ko ngā mahi tētehi wāhanga o te rā

Hei Mahi

He aha te rerekētanga o ēnei kōrero e rua?

1. te kaupapa o te rā
te kaupapa a te rōpū
2. ngā kōrero o te hui
ngā kōrero a te whānau
3. te tangi a te manu
te tangi o te pere

Whakautu:

1. kaupapa o – he wāhanga nō te rā... / kaupapa a – ko 'te rōpū' te kaihangā o te kaupapa
2. kōrero o – he wāhanga nō te hui / kōrero a – ko 'te whānau' te kaituku i te kōrero
3. tangi a – ko 'te manu' te kaimahi / tangi o – ko te oro ka puta i te pere i muri i te patunga e te tangata